



*Senin, 22 Januari 2024*  
**Ogen: Perbahanen 9:5-12**



**Kekeken Ras Terusken**



**N**ina Brian Dyson '*Jangan pernah menyerah ketika kamu masih mampu berusaha lagi. Tidak ada kata berakhir sampai kamu berhenti mencoba.*' Kata enda jadi kata penyemangat man kalak si lit i bas perbeben, i bas perjuangan nta pe enggo pernah gagal. Erbage-bage pengalamen ras kegeluhen teptep manusia, la lit si seri sabap kerina kalak irancang Dibata kegeluhenna alu luar biasa, amin lit si nilah i bas rancanganNa nari. Lit ka si mulih ku rancangan Dibata kenca mentasi proses kegeluhen si la menukah, kedungenna erpengendes ku bas sura-sura Dibata.

Bage me Saul i bas kegeluhenna, masa nguda si dem sura-sura, lit prinsipna nggeluh rikutken kai siiangkana ras igelemna. Kalak si patuh nandangi Taurat dengen tuhu-tuhu ndalankenca, alu la lit tawar menawar. E maka ajaren si la seri ras pengangkanna itulak dengen igasgasina. I bas semangat si bage belinna ia iperhadapkan ras situasi sindauh i bas ukurna. Jumpa ia ras Jesus, si itulak ras pengikutna igasgasina. Ibabai ras iarahken Jesus ia, kerna kai si arus ilakokenkenna. Perjumpanna ras Jesus la mpengadi ia i bas perdalanenna, sabap isuruh Jesus me ia keke dengen nerusken perdalanenna. Amin alu tujun si lanai bagi tangtangna. Banci kepe perdalanan iterusken alu tujun si berubah, ertina i bas dalam sibentasi kita, la sitik perpeben si jumpai, ngubahken prinsip ras tujun geluh. Nterem kalak sijumpai kita si nambahi pengertin ras pengangkanta jadi kesempatenta erlarjar kerna erti ras tujun kegeluhen.

'Life must go on, geluh terus erdalan' nina pepatah. Mari dalani alu metenget ras megermet kerina paksa ras kejadi. Tatap dengen erpengarapen nandangi si mere ras ngaturken kegeluhen enda, gelah ngasup kita erdalan ku tujun si tuhuna.